

TEZAUUR LITURGIC
5 SEPTEMBRIE

ACATISTUL
SF. PROROCI
ZAHARIA
ȘI
ELISABETA



MOSCOVA, 2000



Акафист

святым праведным пророку

Захарии и Елисавете

Кондак 1

Избранныи от рода Ааронова, рождшии Иоанна богохвальнаго, Предтечею и Крестителем Господним предуготованным быти, святии и праведнии Захарие и Елисавето! Яко имущии дерзновение ко Господу, предстательством вашим от всяких нас бед свободите, взывающих вам: Радуйтесь, святии и праведнии Захарие и Елисавето, добрый плод для людей возрастившии.

Икос 1

Ангели земнии и человецы небеснии воистину явистесь, святии Захарие и Елисавето, от юности вашае всеми добродетельми украшении и непорочно житие свое вкупе пожившии, ему же чудящесь, зовем вам гласы хвалебными сице: Радуйтесь, рода Аронова славное прозябение. Радуйтесь, благочестивых родителей светлое

украшение. Радуйтесь, душевныя и телесныя чистоты рачителие. Радуйтесь, заповедей Божиих ревностнии хранителие. Радуйтесь, супрузи праведнии, Богом предъизбраннии. Радуйтесь, на трапезу небесную Господом призваннии. Радуйтесь, святии и праведнии Захарие и Елисавето, добрый плод для людей возрастившии.

Кондак 2

Видев Отец Небесный с высоты славы Своея, яко житие ваше, святии и праведнии Захарие и Елисавето, благочестиво и свято бысть, благослови от отрасли вашея святыя произрасти честному и славному плоду – Иоанну, во еже быти ему пророком, Предтечею и Крестителем Сыну Своему возлюбленному Иисусу Христу, Ему же хвалу воздаем: Аллилуиа.

Икос 2

Разумом Божественным свыше направленный Архангел Гавриил предсташе тебе, иерее Захарие, вшедшему покадити во святилище и служащему по чину чреды своея. Зрящи же вестника небеснаго, одесную алтаря кадильнаго стоящаго, страх велий объяше тя,

обаче посланник Божий рече ти: "Не бойся, Захарие". Мы же, милостию Божиею к семейству твоему умиленные, вопием: Радуйтесь, целомудренного жития крепкое охранение. Радуйтесь, грехов и страстей непреложное одоление. Радуйтесь, благодатию Божиею щедро осененнии. Радуйтесь, зрящие на небе тайны сокровенныя. Радуйтесь, яко ангели бесплотнии, на земли пожившии. Радуйтесь, чистоту телесную в житии своем сохранившии. Радуйтесь, святии и праведнии Захарие и Елисавето, добрый плод для людей возрастившии.

Кондак 3

Сила неизреченная милосердия Божия на вас, святии, открыся, ибо видя праведность хождения вашего пред лицом Божиим, посла вам Господь велие утешение в старости, да поете Ему верно: Аллилуиа.

Икос 3

Имеяй повеление от Господа утешити тя, святе Захарие, возвести ти ангел Божий, яко молитва твоя благоприятна есть Богу и внимая ей, милость ти дарует Бог: благословляше бо

супружницу твою Елисавету, узы неплодства ея разрешая, да родит сына, соименнаго благодати Иоанна. Тем же примите от нас песнь сию: Радуйтесь, житием своим Богу угодившии. Радуйтесь, свято пред Ним неизменно ходившии. Радуйтесь, яко в молитвах своих ко Творцу возвышались есте. Радуйтесь, яко словом Господним всегда утешались есте. Радуйтесь, вся надежды своя на Творца возлагавшии. Радуйтесь, в своих добрых делах утомления не знавшии. Радуйтесь, святии и праведнии Захарие и Елисавето, добрый плод для людей возрастившии.

Кондак 4

Бурею мирскаго жития не одоленный, сын ваш, святии Захарие и Елисавето, велик пред Господем будет, не токмо телом, но и духом, рече Ангел Господень, ибо своим рождеством той принесет в мир велию радость, яко мнози возрадуются рождению его, восхваляя Творца: Аллилуиа.

Икос 4

Слышаще дивныя глаголы о сыне своем, яко той велиим пророком и постником наречется, и

еще от чрева матери своея исполнится Духа Свята и мнози от сыновей Израильских его ради обратятся ко истинному Богу, ибо надлежит ему быти Предтечею Христовым в духе и силе пророка Илии и приуготовити народы ко принятию Спасителя, зело поражен и удивлен бысть Захария, не решаяся реченному Ангелом веровати. Мы же, словесам ангельским внимая, вопием вам сице: Радуйтесь, стяжавшии милость Творца превеликую. Радуйтесь, языкам принесшии радость великую. Радуйтесь, седины свои славою покрывшии. Радуйтесь, наград на небе себя не лишившии. Радуйтесь, милосердному Господу во всем уподоблявшиися. Радуйтесь, Триединому Богу всегда поклонявшиися. Радуйтесь, святии и праведнии Захарие и Елисавето, добрый плод для людей возрастившии.

Кондак 5

Бога точною бояйся, рече ангел Господень Захарии: Аз есмь Гавриил, предстояй пред Богом и посланный благовестити тебе все сие, обаче за то, что ты не уверовал еси словесам моим, будеши немым и не промолвиши ни единого слова дондеже всему реченному мною

надлежит исполниться по воле великаго Бога, Коему славу пою: Аллилуиа.

Икос 5

Видевше людие бывшии в церкви Господней, умедлившу Захария во алтари, зело дивляхуся сему, изшедшу же ему к ним и не могущу глаголати, но токмо помагающе, разумеша вси, яко бысть ему видение во алтари. Мы же, прославляя дивнаго в чудесех Своих Господа, глаголем вам сие: Радуйтесь, яко сила Божия на вас совершися. Радуйтесь, яко воля Божия непреложно на вас сотворися. Радуйтесь, яко милость Творца с преизбытком на вас излися. Радуйтесь, яко радость велия вам щедро Творцем даровася. Радуйтесь, яко вы возвеличены быша дланию святою. Радуйтесь, яко вы всем пример подаете собою. Радуйтесь, святии и праведнии Захарие и Елисавето, добрый плод для людей возрастившии.

Кондак 6

Словес Господних, ангелом возвещенных, сбытие видяще, возрадовася зело Елисавета, ибо зачне сына своего и таяшеся месяц пять, глаголющи: яко тако сотвори мне Господь во

дни, в няже призре отъяти поношение мое в человецех, да пою Ему хвалу: Аллилуиа.

Икос 6

Возсия обильно благодать Божия в Елисавете святей, егда исполнися Духа Свята и возопи гласом велиим Деве Марии: "Благословенна Ты в женах и благословен плод чрева Твоего! И откуда мне сие, яко прииде Мати Господа моего ко мне!". Чадо же ее възыгрися во чреве радощами пришествию Матери Божией. Да и на нас сниде благодать Святаго Духа, вопиющих радощами сице: Радуйтесь, Духом Святым позлащеннии. Радуйтесь, благодатию щедро Творцем осененнии. Радуйтесь, чадо великое свято зачавшии. Радуйтесь, радость отцовства и материнства от Бога познавшии. Радуйтесь, Матери Божией сродницы всечестнии. Радуйтесь, воплотившагося Сына Божия раби преблагии. Радуйтесь, святии и праведнии Захарие и Елисавето, добрый плод для людей возрадившии.

Кондак 7

Хотящу людем возвестити от ангела пронареченное имя сына своего Иоанна, святе

Захарие, по рождестве его написа е и абие отверзошася язык и уста твоя, и глаголаше паки, благословя Бога и поя Ему: Аллилуиа.

Икос 7

Новую подай благодать тебе Господь, праведне Захарие, Духом Святым насыти тя, воеже пророчествовати ти, глаголя: "Благословен Господь Бог Израилев, яко посети и сотвори избавление людем Своим и воздвиже рог спасения нам, в дому Давида отрока Своего, якоже глагола усты святых сущих от века пророк Его и ты, отроча, пророк Вышняго наречешися, предъидеши бо пред лицем Господним, уготовати пути Его". Мы же, пророчеству твоему внимая, чрез вас, праведницы Божии, восхваляем Господа, воспевая вам похвалы сии: Радуйтесь, отроча святое в мир родившии. Радуйтесь, рождеством сим радость миру возвестившии. Радуйтесь, восхвалившии Бога безмерно. Радуйтесь, служившии Господу верно. Радуйтесь, вся Законы Его исполнявшии. Радуйтесь, себя в чистоте сохранявшии. Радуйтесь, святии и праведнии Захарие и Елисавето, добрый плод для людей возрадившии.

Кондак 8

Странное чудо бысть окрест живущим людем, егда слышаху о преславнем и чуднем рождестве чада вашего, святии и праведнии Захарие и Елисавето, и со удивлением глаголаху в себе: "Что убо отроча сие будет?". Мы же, преславному рождеству Предтечи и Крестителя Господня радуящися, Господу взываем: Аллилуиа.

Икос 8

Весь был еси смущением велиим исполнен, пророче Божий Захарие, зря Пресвятую Деву Марию с Богомладенцем ко храму пришедшую и на месте нечистых жен пред дверьми храма ставшую, очищения законнаго просити хотящую. Ведуще бо Ю во Святая Святых тобою, по внушению Божию, введенную и тамо воспитанную и духом уразумев, яко сия Матерь есть Дева Чистая и по рождестве, постави Ю сего ради на месте девиц, идеже женам имущим мужа стояти не подобаше. Мы же, восхваляя с тобою Деву Чистую, с любовью и умилением вопием: Радуйтесь, Матери Божией славу воздавшии. Радуйтесь, купно со всеми Ея восхвалявшии. Радуйтесь, Бога пришествие в мир ожидавшии. Радуйтесь, чистою молитвою

Творца ублажавшии. Радуйтесь, Ликом Младенца Христа услажденнии. Радуйтесь, в Царствие Божие Ним возведеннии. Радуйтесь, святии и праведнии Захарие и Елисавето, добрый плод для людей возрадившии.

Кондак 9

Вси Ангели и святых лики радовахуся радостию велиею, егда ты, святе Захарие, на руке свои праведнии, умилися сердцем и со страхом Божиим, приял еси Богомладенца, и яко Творцу и Богу, возвал еси Ему: Аллилуиа.

Икос 9

Витийство человеческое не довлеет к достойному прославлению дивнаго жития вашего, святии и праведнии Захарие и Елисавето, несть бо возможно исповести и исчести вся моления и пощения ваша, вся слезы и воздыхания ваша яже к Богу. Приимите от нас, любовь к вам подвижаемых, малыя похвалы сия: Радуйтесь, Духа Святаго сосуди от века избраннии. Радуйтесь, руке своя простираху к Творцу в уповании. Радуйтесь, Пресвятая Троицы угодницы вернии. Радуйтесь, к Богу дорогу нашедшии в тернии. Радуйтесь,

трусами своими спасение стяжавшии. Радуйтеся, на Господа токмо во всем уповавшии. Радуйтеся, святии и праведнии Захарие и Елисавето, добрый плод для людей возрастившии.

Кондак 10

Спасения чаду своему хотяще, поят матери чадо свое и бежаху с ним в горы от злочестиваго детоубийцы Ирода, той бо посла в Вифлеем воинов, да избьют вся младенцы, приказа умертвити и чадо ваше, блаженнии Захарие и Елисавето. Мы же, Господу, хранящему избранныя Своя от руки нечестиваго, с любовью глаголем: Аллилуиа.

Икос 10

Стеною заступления от настигавших убийц бысть тебе Господь, праведная Елисавето, егда по молению твоему: "Гора Божия, приими мать с сыном!", повеле горе каменной тотчас расступитися и заключити тебе с чадом в себе. Спасению вашему со слезами радуясь, вопием вам сице: Радуйтеся, Господом на всех путях хранимии. Радуйтеся, рукою Божиею по жизни сей водимии. Радуйтеся, любовь к Творцу в себе

носившии. Радуйтесь, нетленный плод в раю вкусившии. Радуйтесь, за правду Божию пострадавшии. Радуйтесь, быти с Богом возжелавшии. Радуйтесь, святии и праведнии Захарие и Елисавето, добрый плод для людей возрастившии.

Кондак 11

Пение молебное Господу Богу приносил еси, святыи и праведный Захарие, егда воины зверонравнаго Ирода приидоша к тебе с повелением отдати им сына твоего. Ты же отвечал еси им: "Аз служу ныне Господу Богу Израилеву и не вем идеже есть сын мой!", укрепляющему тебя Богу вопияй: Аллилуиа.

Икос 11

Света небеснаго исполнися храм Господень, праведне Захарие, егда вопрошающим тя воином рекл еси: "Тело мое убьете, душу же мою восприимет Господь!" Бывшу же тебе убиту между церковию и алтарем, якоже повеле Ирод, пролившаяся кровь твоя святая сгустися на мраморе и отверде во свидетельство и вечное осуждение Иродово. Мы же, мученическую кончину твою прославляя, воспеваем гласами

хвалебными: Радуйтесь, души Творцу посвятивши. Радуйтесь, в святости их сохранивши. Радуйтесь, славою небесною от Бога венчаннии. Радуйтесь, в радость Господа своего войти призваннии. Радуйтесь, яко пищу нетленную ныне вкушаете. Радуйтесь, яко Бога за нас присно вы умоляете.

Кондак 12

Божественная благодать явися на тебе, праведная Елисавето, и неизреченное чудо дивно открыся, егда бо в горе, укывшей ты со чадом, Божиим повелением устроися пещера, открыся источник водный и над пещерою финикс произрасте, подавая плоды своя во изобилии. Таковому благоволению Божиему радуяся, ты пела еси Ему с чадом своим: Аллилуиа.

Икос 12

Поюще радостную песнь хвалы и благодарения Господу, по истечении сорока дней по убиении праведнаго Захарии, душу свою предаде Творцу своему святая Елисавета и с супругом своим на небеси соединися. Прославляя праведное житие ваше, святии

Захарие и Елисавето, усердно молим вас услышати хвалебное пение наше: Радуйтесь, яко в вере святей вы есте утверждение. Радуйтесь, яко наше от бед вы есте ограждение. Радуйтесь, яко нас от скорбей присно вы защищаете. Радуйтесь, яко страсти телесныя в нас укрощаете. Радуйтесь, благочестивым супругом вы есте покровителие мудрии. Радуйтесь, чадом нашим вы есте воспитателие добрии. Радуйтесь, святии и праведнии Захарие и Елисавето, добрый плод для людей возрадившии.

Кондак 13

О, святии и праведнии Захарие и Елисавето! Молим вас со усердием и любовью: испросите нам у Господа нашего в жизни сей в вере и добродетелех утверждение, от скорбей и напастей избавление, прегрешений наших прощение, да сподобимся и мы Царствие Небесное наследовати и вечно воспевати Богу: Аллилуиа. Аллилуиа. Аллилуиа.

Сей кондак читается трижды. Затем икос 1 и кондак 1.

Молитва

О велиции Христовы праведницы, святии Захарие и Елисавето! К вам прибегаем и вам молимся с великим упованием: принесите за нас грешных святыя молитвы ваша ко Господу да пошлет вся благопотребная душам и телесем нашим, веру праву, любовь нелицемерну, в добрых делех преуспеяние, душам и телесем здравие и вечное спасение. Не презрите молитв наших, со умилением вам возносимых, но будьте нам предстателие ко Господу да сподобимся помощью вашею спасение вечное получитьи, Царствие Небесное унаследовати и вкупе с вами и всеми святыми славословити неизреченное человеколюбие Отца и Сына и Святаго Духа, в Троице покланяемаго Бога, во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**